

MAIAVILLA

In plus da 1,9 milliuns

La radunanza communal da Maiavilla ha approvà il quint annual dal 2025. Quel serra cun in plus da bunamain 1,9 milliuns francs. Plinavant vegn la constituiziun communal revedida parzialmain per reglar da trair a niz aua sutterranea per in diaver energetic. (rtr/fmr)

SIGNURADI

Scumond da far fieu

Pervia da la segira cuntinuanta e pervia dal privel d'incendis da guaud augmentà vala en il Signuradi a partir da mesemna damaun in scumond da far fieu en il guaud ed en la vischinanza dal guaud. Pertugadas en las vischnancas da Maiavilla, Fläsch, Jenins e Malans. Las autoritads appelleschan plinavant dad ir enturn spezialmain precaut cun fieu er ordairer il guaud. (rtr/fmr)

CUIRA



Sper il vegl edifiz (san.) dal Museum d'art dal Grischun è vegni inau-gurà avant diesch onns in nov tract. FOTO RAUTHEFNER

Museum d'art ha survegnì schlantsch – cun il nov tract

Avant diesch onns è vegni avert il «nov» Museum d'art dal Grischun, suenter che quel era vegni engrondì ferm cun in tract separà amez la citad da Cuir. Sco che l'istituiziun valtescha sezza en occasion da quest giubileum (en furma dad ina communicaziun), saja il Museum d'art daventà dapi lura in ferm magnet. Il dumber da visitadoras e visitaders saja sa dubl ed expositiuns attractivas sco er amplifichaziuns sistematicas da la collecziun hajan procurà per ina buna reputaziun da la chasa.

Tenor atgnas indicaziuns han visità ils ultims diesch onns passa 400'000 persunas interessadas al museum. Igl haja dà 82 expositiuns e 2'300 vistas guidadas ed occurrenz. L'Unìun grischuna d'art, la putradra da las expositiuns, crescha cuntinuadamain e dumbra oz var 1'700 commembras e commembres. (cdm/fmr)

FLORA GRISCHUNA

Damain spezias ch'avant 100 onns

Il project Flora Raetica registrescha dapi l'onn 2021 la flora grischuna. 350'000 observaziuns da plantas en gia vegnidas fatgas. Ina emprima conclusiun da quella retschertga è ch'i dat damain spezias ch'avant 100 onns.

CDM/FMR

RG

Dapi l'onn 2021 registrescha il project Flora Raetica flegas e plantas da flur en il Grischun. Il project da «citizen science», vul dir da amaters voluntaris u persunas dal fatg voluntaria, ha gia registrà fin ussa 350'000 observaziuns da plantas e documentà 2'700 spezias per applicaziun da telefonin. Mo igl onn 2025 hai dà 113'000 scuvertas, sco ch'ils responsabels dal project han communitgà quest emna.

In nov cudesch da standard

La tschertga da las plantas dura fin il 2028. Silsuenter evalueschan ils responsabels dal project las datas scientificamain. Or da quellas duai resutar fin il 2032 il nov cudesch da standard «Flora dal Grischun» cun bleras illustraziuns. Quel duai remplazzar il cudesch da medem num d'avant 100 onns da Josias Braun-Blanquet ed Eduard Rübel. «Grazia a las bleras novas observaziuns survegnin nus in maletg exact, nua ch'i

creschan en il Grischun tge plantas e quant savens», vegn cità Christian Rixen, co-manader da Flora Raetica e collavuratur da l'Institut federal per la perscrutaziun da naiv e lavinas en la communicaziun.

Damain spezias ch'avant 100 onns

Ina lavur scientifica sin basa da las registraziuns fatgas fin ussa mussa che 6,5 % da las spezias ch'i deva anc en ils onns 1930 n'èn fin ussa betg pli vegnidas confermas. La mesadad da que-

stas 144 spezias valan sco periclitadas. Spezialmain pertugadas en spezias che dovran cuntradas main cultivadas.

A medem temp sa derasan novas plantas. 13 % da las spezias cumprovas n'appartegnevan avant 100 onns

anc betg a la flora grischuna. Latiers tutgan la papla d'argient ed il charpin (Hagebuche) sco era bleras neofitas. Percunter datti era scuvertas da plantas fitg raras.

Uscchia è la potentilla da naiv (Schneeweisses Fingerkraut) vegnida chattada sur Tavau, e quai l'emprima giada dapi l'onn 1916. «Era sche las datas en pir provisorias, mussan ellas gia cleramain quant fitg che la flora è sa midada durant ils ultims 100 onns», vegn cità Christian Rixen.

Sco ch'ils responsabels da Flora Raetica scrivan, sajan las regions per lung da las valladas principals e da las lingias da traffic fitg bain perscrutadas. Largias pli grondas en lur documentaziun/perscrutaziun datti percenter en la Surselva, en la Val Strussavgia, en la Val Schons, en la Bregaglia ed en il Puschlav.



Voluntarias e voluntaris a la tschertga da plantas sin il Corn Cotschen da Parpan, (foto a san.) La potentilla da naiv è ina da las scuvertas sorprendentas dal project Flora Raetica.



FOTO FLORA RAETICA/ ANNA-BARBARA UTELLI/ ANDREAS GYSGA

Tgi che vul, po s'annunziar al project Flora Raetica ed ir a la tschertga da plantas. Dapi informaziuns en da chattar sut flora.ch.

LIA RUMANTSCHA

«Jau vegn ad empruvar da calmar nossa famiglia rumantscha»

Las delegadas e delegads da la Lia Rumantscha han elegi sonda passada a Chasper Sarott sco nov president da la LR. Il Sentiner ha survegnì 47 vuschs da las 50 persunas presentas.

NICOLÒ BASS/PL

RG

Sonda ha gi lieu a Samedan in sala communal a radunanza da delegadas e delegads da la Lia Rumantscha (LR). Il pli grond interess ha sveglià l'eleziun dal nov presidi da la LR. Datti vinavant in co-presidi cun Urezza Famos e Bernard Maissen u surprinda Chasper Sarott il timun da la LR, è sa dumandada la sala bain occupada. Il resultat è la fin dals quints stà cler: Cun 47 da 50 vuschs daventa Chasper Sarott il nov president da la LR. Gist suenter l'eleziun ha el respondì in pèr dumondas.

RTR/PL: Chasper Sarott, Vus essas vegni elegi cun in resultat fitg cler. Cun tge sentiments surpigliais Vus questa incumbensa?

Chasper Sarott: Jau surpigli questa nova plaiv cun bler respect. Las sfidas èn grondas. Quai ha questa radunanza da delegadas e delegads mussà evidentamain. Jau prend serius tut quai ch'è vegni ditg durant la radunanza. Jau hai gugent grondas sfidas e perquai m'allegrel da pudair lavurar cun ina suprastanza giuvna. Jau vegn ad empruvar da calmar puspè nossa famiglia rumantscha. Nus stuain puspè lavurar pli ferm ensemen.

Avais Vus sco candidat per il presidi profità dals scumbigs da las ultimas emnas?

Jau hai garantì profità. Jau na fatsch naginas illusiuns. Cura che jau hai dà enconuscher mia candidatura durant il mais mars, hai jau vuli dar ina alternativa a las delegadas ed als delegads. Quella giada n'era jau anc betg conscient da tut quai ch'è vegni fatg suenter. Ma cun la malsegriezza mettan ins adina er en dumonda tschertas chaussas. E da quai hai jau pudì profitar.

Vulais Vus sco nov president cuntinuar cun la strategia che la Lia Rumantscha ha defini il ultims onns?



«Jau vegn ad empruvar da calmar puspè nossa famiglia rumantscha.»

Chasper Sarott,
President da la Lia Rumantscha

La strategia 2026 fin 2030 è gia vegnida acceptada da la radunanza e quella n'è betg adina da metter en dumonda. Per mai èsi era logic, che cun realisar la strategia mettan ins era en dumonda las structures. Per mai il pli impurtant en questa fasa è d'emprerder d'enconuscher las collegas ed ils collegas da suprastanza e da guardar ensemen, sche tut las decisiuns èn vegnidas prendidas legalmain. Sche quai è il cas, na datti nagina raschun da metter en dumonda quai ch'è vegni fatg. Ussa stuain nus consolidar quai che nus avain e metter tut sin via per ils proxims onns.

Nova strategia, nova struttura d'organaziun: Vus avais ussa da surpigliar quella ed implementar. Co giais Vus enturn cun quai?

Jau sun disà causa mia experienscha da lavur da surpigliar la responsabladad en lieus, nua ch'igl ha dà midadas e nua ch'ins ha definì novas structures e strategias. Cun mia eleziun na vegn ussa betg mess en dumonda tut. Jau sun bun da m'adattar. Mintga organisaziun dovra adina puspè adattaziuns. Quellas pon esser pli pitschnas u pli grondas. Era vulain nus esser ina Lia ch'è flexibla ed adattada a quai che fa da basegn.

Igl è er enconuscher che l'anterier secretari general è in da Voss amis da curling. Ins ha era pudì udir che Vus na veglias gnanc pli candidar senza Voss ami. Tge schutis Vus da quellas famas?

Jau hai era stuì rir, cura che jau hai udi quest'istorgia. Jau sun bain stà surstà ed hai gi malavita per el. Per mia intenziun da vulair m'engaschar e ma metter a disposiziun sco president da la Lia Rumantscha n'hai quai midà nagut. Anzi, la motivaziun era anc pli gronda da vulair porscher in alternativa.

Tge en Vossas finamiras a curta vista?

L'emprim stoss jau emprerder d'enconuscher il team da la suprastanza e natiralmain era tut las collavuraturas e tut ils collavuraders da la Lia Rumantscha e las persunas da las uniuns affiliadas.

Vus essas diplomat da professiun. Essas Vus era bun da dar mintgant in cloc sin maisa?

Jau sun diplomat da professiun e mia mamma di che jau saja stà diplomat gia da pitschen. Quai na vul betg dir ch'ins na possia ina giada er metter il pugn sin maisa, almain figurativmain. Jau pens ch'i dettia er autras modas da discutir in cun l'auter. Avair ina posiziun e s'engaschar per sias valurs pon ins era senza pigtar sin maisa.